

Fula - Yonki Deftere - Soul Scriptures

Matta 11:28-30 "Onon sombe e roondiibe doongle tedduđe fuu, ngare haa am, mi ittan on doongle man. 29 Dowtaneedam, ekkite haa am, ngam mi booddoo, mi torrataa on. Fakat, yonkiji moodon ciwtoto. 30 Ngam ko mi umrata on, dum nafan on, ko mi roondata on boo, dum teddantaa on."

Laataanooji 2:7 Nden Jehovah Jawmiraawo tagi nedđo bee mbulwuldi lesdi, fuufi poofde ngeendam nder kine maako. Bana ni nedđo laatori yonki geeti.

Laataanooji 34:2,3,8 Sikem bii Hamor Hewijjo, laamdo lesdi, yi'i mo. O hoo'i mo, o waaldi bee maako, o toski mo. 3 Yonki maako dakkotiri bee Dina bii Yakubu, o yidü paanyo debbo, o dabbi de'itingo mo. 8 Hamor wolwani be, wi'i: "Biyam Sikem, yonki muudum dakkotiri bee biŋgel moodon, useni te'ne mo haa maako.

Limle 21:4 Too, yimbe Isra'iila ummi hooseere Hor, tokki laawol weendu kewe, ngam taaro lesdi Edoom. Ammaa haa laawol man, munyal mabbe jinni.

Tooktaaki Tawreeta 4:29 On dabbi tan Jehovah Jawmiraawo mon ton. To on dabbi mo bee bernde woore, on tawan mo.

Alkaali'en 16:16 Bana ni o tokkori Samson bee haala man nyalde fuu, haa Samson somi, waawaay munyango dum.

1 Samuyila 18:1 Nde bolidal Sawulu bee Daawuda timmi, bernde Yoonatan bii Sawulu fuddi yidugo Daawuda masin. O yidü mo bana yonki maako.

1 Laamiibe 1:29 Laamiido huni, wi'i: "Fakat bana Jawmiraawo o geeto, mo hisni yonki am e billaare fuu!

2 Laamiibe 4:27 O wari haa godđo Jehovah, haa dow hooseere, o naŋgi kosđe maako. Geehaji baditi ngam o yerba mo. Ammaa godđo Jehovah wi'i: "Accu mo. Bernde maako metti. Jawmiraawo suudi yam dum, o waŋginanaay yam dum."

Ayuba 7:11 Too, mi naŋgtataa hunduko, mi yoofan ko. Dum ko billata ruuhu am, dum mbolwanmi. Dum ko laskinta bernde am, dum mboyanmi.

Ayuba 14:22 Sey torraaji nder bandu maako naawan mo, sey ngam maako tan bernde maako sunoto.

Ayuba 19:2 Ndey accoton billugo bernde am? Haa ndey bolle moodon don torra yam?

Ayuba 27:2 Mi don hunoro ngeendam Jehovah Baawđoo oo, oon mo sottini goonja am, mo torri yam:

Ayuba 30:25 Naa mi boydo bee nastudo billaare na? Naa mi endudo koomoy talakaajo na?

Jabuura 6:3,4(4,5) Yamđitinam, ngam i'e am don ndiwna, yonki am fuu don

saklo. Haa ndeye, ya Jawmiraawo? 4(5) Wartu, ya Jawmiraawo, hisnu yoŋki am, wallam ngam daliila hinnuye ma.

Jabuura 7:1,2(1-3) Daawuda yimani Jawmiraawo yimre nde'e ngam daliila Kuusi Benyaminijjo. (2) Ya Jehovah Jawmiraawo am, haa maada mi don dabbiba hisrude, hisnam juŋgo toonyoowo yam, wallam. 2(3) Taa o seekammi bana mbarooga, ngam kisnoowo yam feere woodaa.

Jabuura 17:13 Umma, ya Jawmiraawo, dartana konne'en am, do'u be. Bee kaafahi ma hisnam juude hallube,

Jabuura 23:3 O don sembidina yoŋki am, o don dowammi dow laawol darnungol ngam o koolniido.

Jabuura 25:20 Aynu yoŋki am, hisnam. Taa semtinam, ngam haa maada dabbitanmi hisrude.

Jabuura 33:19 O hisnan yoŋkiji mabbe e maayde, o wuurnan be nder wakkatiji weelo.

Jabuura 34:22(23) Jawmiraawo hisnan yoŋkiji maccube muudum, hoolotoobe mo fuu kisan kiita.

Jabuura 35:12,13 Be don mbarjo mboodeenga am bee halleende, mi itti tammunde fuu. 13 Saa'i be nyawbeno, mi borni buhuure, mi torri hoore am bee suumaago, mi do'ani be, hoore am turiinde.

Jabuura 41:4(5) Mi wi'no: "Ya Jawmiraawo, mi wađi hakke dow maada, ammaa hinnam jonta, nyawndam."

Jabuura 42:5(6),11(12) Ko nafata to mi uumi, to mi woyi bana non? Ndikka mi hoolo Jawmiraawo. Mi anndi mi yettan mo fahin, ngam kaŋko woni balloovo yam e Jehovah am. 11(12) Ko nafata to mi uumi, to mi woyi bana non? Ndikka mi hoolo Jawmiraawo. Mi anndi mi yettan mo fahin, ngam kariko woni balloovo yam e Jehovah am. (Jabuura 42:6(7),11(12); 43:5)

Jabuura 56:13 Ya Jehovah, sey mi hebbinane togayeeje am, mi lii'ano ma gettooje.

Jabuura 69:10(11) Mi torri hoore am bee suumaago, ammaa yimbe don kudammi.

Jabuura 69:18(17) Taa wirnu maccudo ma gite ma, mi billiido, jaabam law.

Jabuura 86:13 Mo'ere ma dow am nde mawnde, a hisni yoŋki am nastugo joonde maaybe.

Jabuura 97:10 Jawmiraawo yidi wanybe halleende, o don ayna yoŋkiji hulbe mo, o hisnan be juude hallube.

Jabuura 107:9 Kaŋko o yarnan domdaabe, o haarnan weelaabe bee kuuje boodde.

Jabuura 116:4 Nden ewniimi innde Jawmiraawo: "Ya Jawmiraawo, mi don toro ma, hisnam."

Jabuura 116:8 Jawmiraawo hisni yam maayde, wosti gondi am, hadi kosde am

fergaago.

Jabuura 119:28 Bernde am don sakli masin, sembidinam bee wolde ma.

Jabuura 120:2 Ya Jawmiraawo, hisnu yonki am e fewoobe, wadbe tufle dow am.

Jabuura 121:7 Jawmiraawo ayne e sarru fuu, o hisna yonki ma.

Jabuura 124:7 En ndadi bana sondu naangaandu nder tuuforgol loohoowo.

Tuuforgol ta'i, en ndimdi.

Jabuura 138:3 Saa'i mi ewni ma, a jaabi yam, a sembidini yonki am masin.

Balndi 6:32 Fakat, baddo njeenu bee debbo, o walaa hakkiilo. Sey giidjo
halkugo yonki mum huuwata bana non.

Balndi 22:25(23:2B) ngam taa a woowa laabi maako, a wadana yonki ma
tuuforgol.

Yeremiya 20:13 Ngimane Jawmiraawo! Mañte Jawmiraawo! Ngam o hisni
yonki laafudo e juude hallube.

Yeremiya 31:25 Mi sembidinan koomoy comdo, mi haarnan koomoy beelaado
bee nyaamdu.

Ejekiyel 13:20,21 Ngam maajum min Jehovah Jawmiraawo mbi'anmi: Mi don
wanya leppi mon di kuuwtinirton ngam nangugo yonkiji. Mi seekan di dow
juude mon, mi rimdina yonkiji di loohotoodon bana colli. 21 Mi seekan
sallabijje mon boo, mi rimdina yimbe am e juude mon, on meetataa loohaago
be. Bana non anndirton min woni Jawmiraawo.

Matta 10:28 Taa kule waawanbe mbarugo balli moodon, ammaa be mbaawataa
mbarugo yonki. Kule Jehovah baawando halkugo bandu e yonki fuu nder
yiite jahannama.

Matta 16:26 To neddo hebi duniyaaru fuu, ammaa o majjini yonki maako, dume
dum nafata mo? Woodaa sam! Walaa koodume ko neddo waawi hokkugo
ngam soottugo yonki muudum. (Markus 8:36,37)

Matta 22:37 Yeesu jaabi mo: "Yid Jehovah Jawmiraawo ma bee bernde ma fuu,
bee yonki ma fuu, e bee ruuhu maada fuu.

Matta 26:38 Nden o wi'i be: "Torra bernde am badake mbarugo yam. Njoode
haa do, ayne bee am." (Markus 14:34)

Markus 12:30 Yid Jehovah Jawmiraawo maada bee bernde ma fuu, bee yonki
ma fuu, bee hakkiilo ma fuu, e bee sembe ma fuu.

Luka 12:20 Ammaa Jehovah wi'i mo: Sooya-hakkiilojo, jemmaare nde'e mi
hoosan yonki ma, kuuje maada a moobti de fuu, moy marata de?

Luka 21:19 Bee tiddinaare mon on kisnan yonkiji moodon."

Yuhanna 12:27 Yeesu wi'i: "Jonta bernde am sakli. Dume mi wi'ata? Mi wi'a
Baabiraawo hisnammi torra saa'iire nde'e na? Ammaa fakat mi wari ngam mi
torro nder saa'iire nde'e.

Kuude Nelaabe 14:22 Be cembidini nuddinbe, be tiddini be be tokko nuddingo
bee bernde woore. Nden be mbi'i: "Sey bee boneeji duuddi en nastirta laamu

Jehovah."

Kuude Nelaabe 15:24 Min nani wodbe amin njehi haa mon, ndimbi on, cakli on bee bolle mabbe. Ammaa minin min nelaay be.

1 Korintu'en 15:45 Ngam deftere wi'i: "Aadamu, neddo arano laati yonki geeti." Ammaa Aadamu ragareejo, waato Almasiihu, laati Ruuhu ndokkoowu ngeendam.

1 Tessaloniiki'en 5:23 Jehovah, dokkoowo en jam, timmitina senugo on, ayna on on laabbe bee ruuhu e yonki e bandu fuu haa nyalaade garoyki Jawmiraawo men Yeesu Almasiihu.

Ibraniŋko'en 6:19 Tammunde nde'e laatani en bana tiggirgal yonki, nde dimbataako, nde laati hisrude, nde don saalo gada wirndallo haykaliiru asama haa yotto nder yebre maaru burnde senaago.

Ibraniŋko'en 10:39 Enen kam en laataaki nder loriibe baawo, halkanbe. Ammaa en don tabiti nder nuddinki, en kisan.

Yakuba 1:21 Ngam maajum ngudine halleende e kuude kallude fuu. Tuubane Jehovah, njabe wolde nde o aawata nder berde moodon, ngam nde waawan hisnugo on.

Yakuba 5:20 Ciftore du'um: Koomoy lorni mardo hakke diga laabi kalludi, hisni yonki mardo hakke oo, suddan hakkeeji duuddsi.

1 Piyer 1:9 ngam on keban ko on tammoto nder nuddinki moodon, kanjum woni kisndam yonkiji moodon.

1 Piyer 1:22 Jonta nde on ceni ko'e moodon bee dowlanaago goonja, on ngidi deerdiraabe nder nuddinki. Ngam maajum ngidindire bee berde laabde, bilaa naafikaare.

1 Piyer 2:11 Soobiraabe am, on laati hodbe e jananbe haa duniyaaru ndu. Ngam maajum mi tori on taa on accana suunooji bandu laawol, ngam tum di don dabba halkugo yonkiji moodon.

1 Piyer 4:19 Ngam maajum, koomoy yari bone ngam Jehovah muuyani mo dum, taa o acca huuwugo mboodeenga, ammaa o hoolo tagdo mo, mo yoofataa mo sam.

2 Piyer 2:7,8 O hisni Ludu, goddo booddoo. Nder jamanu Ludu, hallube njarni mo bone bee joonde mabbe hallunde. 8 Ngam booddoo oo o joodi caka mabbe, o yi'i, o nani halleende mabbe, dum torri bernde maako masin.

3 Yuhanna 1:2 Soobaajo am gidaado, mi don yelo a jamo koodume bana mi anndi a jamo nder bernde ma.